

<><><><><><>

CM Tourism

मुख्यमंत्री ओमर अब्दुल्ला होरें कश्मीर च सैलसफा आहले खेत्तर च परतियै उछाल दिक्खियै इसदा सोआगत कीता ते इसी इक खरी सारत दस्सेआ ऐ। पहलगाम दे अपने दौरे मगरा उ'नें संदोख जाहर कीता ते आखेआ जे मशहूर सलानी थाहर पहलगाम च हून परतियै जान आई गई ऐ कीजे मुख्य भरै थमां सैलानी ते मुकामी लोक हून उत्थे जा करदे न। सोशल मीडिया मंच एक्स पर कीते गेदे अपने इक पोस्ट च मुख्यमंत्री होरें आखेआ जे सैलानिएं दा औना इस गल्ला दा सबूत ऐ जे लगातार जतन हून नतीजे देआ करदे न। 22 अप्रैल गी पहलगाम दी बायसरन घाटी च होए दे आतंकवादी हमले च 26 लोक मारे गे हे जेहदे मगरा सैलानिएं दी आमद भलेआं घट्ट होई गई ही पर हून सैलानी गतिविधिएं च परतियै तेजी दिक्खने गी लब्धा करदी ऐ।

<><><><><><>

Doda Tourism

पहलगाम आतंकी हमले दे मगरा सैलसफा खेत्तर गी लग्गी दी जबरदस्त पच्छाड़ दे मगरा हून डोडा जिले दे भद्रवाह दी मशहूर जाई घाटी च इक बारी फही सैलानिएं दी खरी मती आमद दिक्खने गी लब्धा करदी ऐ। डिप्टी कमिशनर हरविंदर सिंह होरें आखेआ ऐ जे एलजी मनोज सिन्हा हु'दे निर्देशों पर सैलानिएं अंदर बसाह—भरोसा ब्हाल करने लेई केई गैहीं पुट्टियां गेइयां न। सैलसफा निदेशालय दे सैहयोग कन्नै खित्ते च सैलसफा गी बढ़ावा देने दे मकसद कन्नै केई सारी मशहूर हस्तिएं गी बी खास तौर पर सददेया गेदा हा। मुकामी प्रशासन ते जनजातीय समुदाय दे जतनें दे चलदे हून जाई घाटी च हर रोज तकरीबन 4 ज्हार सैलानिएं दी आमद दर्ज कीती जा'रदी ऐ ते एहदे कन्नै मुकामी अर्थबवस्था गी बी खरा मता बढ़ावा थोआ करदा ऐ।

<><><><><><>

Dy CM Roads

सैलसफा गी जम्मू—कश्मीर दी अर्थबवस्था दी रीढ़ दी हड्डी करार दि'दे होई उपमुख्यमंत्री सुरिंदर चौधरी होरें आखेआ ऐ जे सरकार सैलसफा गी बढ़ावा देने लेई सिडक संपर्क गी बड़ी मती तरजीह देआ करदी ऐ। उ'नें आखेआ जे जम्मू—कश्मीर च औने आहलें गी बक्ख—बक्ख चाल्ली दे सैलसफा तजुर्बे हासल हु'दे न। उपमुख्यमंत्री होरें इब्बी आखेआ जे प्रदेश च, खासकरियै जम्मू खित्ते च नमीं सैलानी थाहरां विकसित करने दे जतन बरोबर जारी न। चौधरी होरें आम लोकें गी गुजारिश कीती जे ओह सोशल मीडिया दे राहें सिडकें दी स्थिति बारे जानकारीयां सांझी करदे रौहन।

<><><><><><>

CS Amarnath

मुख्य सचिव अटल डुल्लु होरें अज्ज श्री अमरनाथ जी दी पवित्तर गुफा जाइयै उत्थे श्रद्धालुएं लेई कीते गेदे बंदोबस्तें दा जायजा लैता। अपने दौरे दरान उ'नें श्रद्धालुएं लेई उत्थे कीते गेदे डाक्टरी बंदोबस्तें दे बारै च बी तपसीली जानकारी हासल कीती। सरबंघत अधिकारिएं उ'नेंगी डाक्टरें दी तैनाती, एमरजेन्सी दिक्खभाल आहले सरिस्ते दी उपलब्धता ते मदादी ढांचे दे बारै च जानकारी दित्ती। मुख्य सचिवें होरें औंदी 3 जुलाई थमां शुरु होने आहली श्री अमरनाथ जी दी सलाना जात्तरा लेई कीते गेदे बंदोबस्तें पर खुशी जताई। मेद ऐ जे मुख्य भरै थमां ज्हारां बद्धे श्रद्धालु इस ब'रे श्री अमरनाथ जी दी जात्तरा पर औडन।

<><><><><><>

Health Sec Amarnath

श्री अमरनाथ जी दी जात्तरा लेई तैयारियां हून जोर फगड़ा करदि'आ न ते इस्सै सरबंघै च सेहत सचिव डाक्टर सैय्यद आबिद रशीद शाह होरें पहलगाम च सेहत सरबंघी स्हूलतें दा जायजा लैता। उ'नें नुनवन आधार शिविर उपजिला अस्पताल ते चंदनवाड़ी च 100 बिस्तरें दी समर्थ आहले अस्पताल च मेडिकल ढांचे दा जायजा लैता। इस दरान वरिष्ठ सेहत अधिकारी बी उ'दे कन्नै मजूद हे। डाक्टर आबिद होरें 24 घंटे सेहत स्हूलतां उपलब्ध करोआने, जरूरी दोआईएं दी उपलब्धता, मरहलेवार ढंगै सिर मेडिकल टीमें दी तैनाती पर जोर पाया। उ'नें माहिर अमले ते पूरे पराते सरिस्ते ते आपातकालीन दिक्खभाल जकीनी बनाने पर बी जोर दित्ता।

<><><><><><>

Op Sindhu (byte)

विदेश राज्यमंत्री पबित्रा मारघरीटा होरें ईरान दे मशहाद इलाके थमां बशेश डुआरी दे राहें नमीं दिल्ली आहन्ने गेदे 285 भारतीयें दे समूह दा सोआगत कीता। उ'नें दस्सेआ जे आपरेशन सिंधु दे तैहत अजें तगर 1 जहार 713 भारती बसनीकें गी ईरान थमां सुरक्षित बचाइयै मुख्य वापस आहन्नेआ जाई चुके दा ऐ। उ'नें इब्बी दस्सेआ जे अगले द'उं दिनें दरान ईरान थमां 2 शा 3 होर डुआरियां चलाने दा कार्यक्रम ऐ। राज्यमंत्री होरें गलाया जे बदेश मंत्रालय नै ईरान ते इजराईल च रवै करदे सभ्भनें भारती बसनीकें कन्नै लगातार संपर्क बनाई रखे दा ऐ।

<><><><><><>

DC Jammu Monsoon

बरसांती दा मौसम आई गेदा ऐ ते एहदे मददेनजर जम्मू दे डिप्टी कमिशनर सचिन कुमार वैश्य होरें मैहकमा पुलस, हाड़ें दी रोकथाम, पीएचई, पीडब्ल्यूडी ते सेहत मैहकमे दे वरिष्ठ अधिकारिएं कन्नै बैठक लाई ते सरबंघत तैयारिएं दा जायजा लैता। डिप्टी कमिशनर होरें हाड़ें दी रोकथाम ते बचाऽ आहले इलाकें दी शिनाख्त करने लेई गलाया। उ'नें नियंत्रण कक्ष कायम करने ते एम्बूलैसं दी तैनाती वगैरा लेई बी गलाया। इसदे अलावा उ'नें लोकें गी जागरूक करने लेई गतिविधियां चलाने दी जरूरत पर जोर पाया।

<><><><><><>

PMFME Ramban

मुकामी उद्यमिणं, करसानें ते युवाणं गी सशक्त बनाने दे मकसद कन्नै बागवानी योजना ते बजारें सरबंधी विभाग रामबन आसेआ खाने—पीने आहली चीजें गी डब्बाबंद करने सरबंधी उद्यम — पी.एम.एफ.एम.ई. योजना तैहत इक कार्यशाला दा सरिस्ता कीता जा'रदा ऐ। एह्दा मकसद करसानें, आप सहायता समूहें, एफ.पी.ओ., सहकारिता ते बेरोजगार युवाणं गी स्कीम दे लाह् बारै जानकार बनाना ऐ। एह्दे राहें 35 फीसद सब्सिडी उप्पर खाने—पीने आहली चीजें गी डब्बाबंद करने सरबंधी इकाई कायम करने च मदाद कीती जा'रदी ऐ।

<><><><><><>